

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ԿՐԹԱՀԱՄԱԼԻՐԻ
ԳԻՏԱԿԱՆ ԽՈՐՀՈՒՐԴ
Ո Ր Ո Շ ՈՒ Մ**

01 ապրիլի 2025 թվականի № 7

ՀՀ ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ՈՍՏԻԿԱՆՈՒԹՅԱՆ ՔՐԵԱԿԱՆ ՈՍՏԻԿԱՆՈՒԹՅՈՒՆՈՒՄ ՊԱՇՏՈՆՆԵՐԻ ՆՇԱՆԱԿՎԵԼՈՒ ՆՊԱՏԱԿՈՎ ՈՍՏԻԿԱՆՈՒԹՅԱՆ ԾԱՌԱՅՈՂՆԵՐԻ ՎԵՐԱՊԱՏՐԱՍՏՄԱՆ ԴԱՍԸՆԹԱՑԻ ՀԱՄԱԼԻՐ ՔՆՆՈՒԹՅԱՆ ԿԱՐԳԸ ՀԱՍՏԱՏԵԼՈՒ ՄԱՍԻՆ

Հիմք ընդունելով ՀՀ ՆԳ նախարարի 05.01.2024 թ. 1-Լ հրամանը և ղեկավարվելով ՀՀ կառավարության 2024 թ. դեկտեմբերի 12-ի № 1989-Ն որոշմամբ հաստատված «Հայաստանի Հանրապետության ներքին գործերի նախարարության կրթահամալիր» պետական ոչ առևտրային կազմակերպության կանոնադրության 52-րդ կետի 17-րդ ենթակետով՝ Հայաստանի Հանրապետության ներքին գործերի նախարարության կրթահամալիրի գիտական խորհուրդը **որոշում է՝**

1. Հաստատել՝ ՀՀ ներքին գործերի նախարարության ոստիկանության քրեական ոստիկանությունում պաշտոնների նշանակվելու նպատակով ոստիկանության ծառայողների վերապատրաստման դասընթացի համալիր քննության կարգը՝ համաձայն հավելվածի:

2. Սույն որոշումն ուժի մեջ է մտնում ընդունման պահից:

**ՀՀ ՆԳՆ ԿՐԹԱՀԱՄԱԼԻՐԻ ՌԵԿՏՈՐԻ
ԺԱՄԱՆԱԿԱՎՈՐ ՊԱՇՏՈՆԱԿԱՏԱՐ,
ԻՆՔԸ ԵՎ ՀՀ ՆԳՆ ԿՐԹԱՀԱՄԱԼԻՐԻ
ԳԻՏԱԿԱՆ ԽՈՐՀՐԴԻ ՆԱԽԱԳԱՀ**

Մ.ՄՈՒՐԱԴՅԱՆ

«ՀԱՎԵԼՎԱԾ»

ՀՀ ՆԳՆ կրթահամալիրի գիտական խորհրդի

«01» 04. 2025 թ. թիվ 7 որոշման

ԿԱՐԳ

ՀՀ ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ՈՍՏԻԿԱՆՈՒԹՅԱՆ ՔՐԵԱԿԱՆ ՈՍՏԻԿԱՆՈՒԹՅՈՒՆՈՒՄ ՊԱՇՏՈՆՆԵՐԻ ՆՇԱՆԱԿՎԵԼՈՒ ՆՊԱՏԱԿՈՎ ՈՍՏԻԿԱՆՈՒԹՅԱՆ ԾԱՌԱՅՈՂՆԵՐԻ ՎԵՐԱՊԱՏՐԱՍՏՄԱՆ ԴԱՍԸՆԹԱՑԻ ՀԱՄԱԼԻՐ ՔՆՆՈՒԹՅԱՆ

1. ԸՆԴՀԱՆՈՒՐ ԴՐՈՒՅԹՆԵՐ

- 1.1. Սույն կարգով սահմանվում են ՀՀ ներքին գործերի նախարարության ոստիկանության քրեական ոստիկանությունում պաշտոնների նշանակվելու նպատակով ոստիկանության ծառայողների վերապատրաստման դասընթացի ավարտական փուլի՝ համալիր քննության (այսուհետ՝ համալիր քննություն) կազմակերպման և անցկացման ընթացակարգերը:
- 1.2. Համալիր քննությունն անցկացվում է «Օպերատիվ-հետախուզական գործունեություն», «Ոստիկանության օպերատիվ-հետախուզական գործունեության տեղեկատվական ապահովումը և փաստաթղթավորումը», «Գաղտնի գործավարություն», «Ոստիկանության օպերատիվ-հետախուզական գործունեության մարտավարությունը» առարկաներից:

2. ՀԱՄԱԼԻՐ ՔՆՆՈՒԹՅԱՆ ԿԱԶՄԱԿԵՐՊՈՒՄԸ ԵՎ ԱՆՑԿԱՑՈՒՄԸ

- 2.1. Համալիր քննությունը անցկացվում է սույն կարգի 1.2 կետով նախատեսված առարկաներից մասնագետներով համալրված դասախոսական կազմի (այսուհետ՝ դասախոսական կազմ) կողմից:
- 2.2. Դասախոսական կազմը ձևավորում է ՀՀ ՆԳՆ կրթահամալիրի ռեկտորի հրամանով:
- 2.3. Դասախոսական կազմի անդամները պետք է ունենան գաղտնիության առնվազն երկրորդ կարգի թույլտվություն՝ գաղտնիության դրոշմագիր ունեցող թեստով անցկացվող թեստավորման արդյունքները, գաղտնի առարկաներից տեսական հարցերի պատասխանները գնահատելու համար:
- 2.4. Համալիր քննության ժամանակացույցը՝ ըստ օրերի և դասակների (խմբերի), հաստատվում է Կրթահամալիրի ռեկտորի կողմից:
- 2.5. Համալիր քննությունն անցկացվում է բանավոր և թեստավորման ձևով (թղթային)՝ տոմսերի միջոցով: Յուրաքանչյուր տոմս բովանդակում է տեսական երկու հարց, ընդ որում՝ մեկ հարց «Օպերատիվ-հետախուզական գործունեություն»

առարկայից, մեկ հարց՝ «Ոստիկանության օպերատիվ-հետախուզական գործունեության մարտավարությունը» առարկայից, և 20 առաջադրանք պարունակող թեստ՝ «Ոստիկանության օպերատիվ-հետախուզական գործունեության տեղեկատվական ապահովումը և փաստաթղթավորումը», «Գաղտնի գործավարություն» առարկաներից:

2.6. Գաղտնիության դրոշմագիր ունեցող թեստեր պատրաստելը, թեստավորման ժամանակ դրանք օգտագործելը, լրացված թեստերը ստուգելը, ստուգված թեստերի հետագա պահպանումը և ոչնչացումը կատարվում են գաղտնի գործավարության կանոններին համապատասխան: Թղթային եղանակով անցկացվող թեստավորման ժամանակ օգտագործվող՝ գաղտնիության դրոշմագիր ունեցող թեստերը Կրթահամալիրի քարտուղարությունից ստանում է դասախոսական կազմի՝ գաղտնիության երկրորդ կարգի թույլտվություն ունեցող անդամը, ով թեստավորման ավարտից հետո ստուգված թեստերը վերադարձնում է Կրթահամալիրի քարտուղարություն:

2.7. Համալիր քննության հարցաշարը, տոմսերը, թեստերը և դրանց հիմքում ընկած իրավական ակտերի ցանկը, հաստատվում են ամբիոնների նիստում: Համալիր քննության հարցաշարը և իրավական ակտերը սովորողներին տրամադրվում են համալիր քննությունից առնվազն երկու շաբաթ առաջ:

2.8. Համալիր քննությանը ներկայացած սովորողի նույնականացումը կատարվում է սովորողի անձը հաստատող փաստաթղթի միջոցով:

2.9. Համալիր քննության անցկացման ընթացքում քննասենյակում կարող են միաժամանակ գտնվել առավելագույնը 5 սովորող:

2.10. Համալիր քննությանը ներկայացած սովորողն ընտրում է տոմսը, որի հետ միասին սովորողին տրվում է նաև համապատասխան թեստը: Պատրաստվելու համար նրան տրամադրվում է առնվազն 30 րոպե: Տոմս փոխելն արգելվում է: Պատասխանին պատրաստվելիս նշումներ կատարելու համար հանձնաժողովը սովորողին տրամադրում է կնքված թերթիկներ:

2.11. Դասախոսական կազմում ընդգրկված անդամն իրավունք ունի սովորողի գիտելիքները, կարողությունները և հմտությունները գնահատելու համար նրան տալ ճշգրտող և լրացուցիչ հարցեր՝ համալիր քննության հարցաշարի սահմաններում:

2.12. Սովորողն իրավունք ունի համալիր քննության ավարտից հետո դասախոսական կազմից ստանալ բանավոր պարզաբանում գնահատման չափանիշների վերաբերյալ:

2.13. Սովորողը պարտավոր է՝

1) համալիր քննությանը ներկայանալ անձը հաստատող փաստաթղթով:

2) դասախոսական կազմի և այլ սովորողների նկատմամբ դրսևորել հարգալից վերաբերմունք:

3) պահպանել գաղտնիության ռեժիմը:

2.14. Սովորողին արգելվում է՝

1) քննական սենյակ մուտք գործել բջջային հեռախոսով, այլ էլեկտրոնային սարքերով, տեխնիկական միջոցներով, ուսումնական նյութերով կամ ծածկագրերով, ինչպես նաև օգտվել դրանցից:

2) հաղորդակցվել այլ սովորողների հետ, միմյանց փոխանցել տոմսերը կամ նշումների համար դասախոսի կողմից տրամադրված թերթիկները:

3) աղմկել կամ այլ կերպ խոչընդոտել համալիր քննության անցկացմանը:

- 4) քննական սենյակից դուրս հանել կնքված թերթիկները կամ թեստը:
- 2.15. Սովորողի կողմից համալիր քննության կարգի խախտում է համարվում համալիր քննության ընթացքում հետևյալ արարքներից առնվազն մեկի կատարումը՝
- 1) քննական սենյակ մուտք գործել բջջային հեռախոսով, այլ էլեկտրոնային սարքերով, տեխնիկական միջոցներով, ուսումնական նյութերով կամ ծածկագրերով.
 - 2) բջջային հեռախոսից, այլ էլեկտրոնային սարքերից, տեխնիկական միջոցներից, ուսումնական նյութերից կամ ծածկագրերից օգտվելը,
 - 3) այլ սովորողների հետ հաղորդակցվելը, տոմսերը կամ նշումների համար տրամադրված թերթիկները այլ սովորողներին փոխանցելը,
 - 4) աղմկելը կամ այլ կերպ համալիր քննության անցկացմանը խոչընդոտելը,
 - 5) քննական հանձնաժողովի անդամների կամ այլ սովորողների նկատմամբ անհարգալից վերաբերմունք դրսևորելը,
 - 6) քննական սենյակից կնքված թերթիկները կամ թեստը դուրս հանելը,
 - 7) գաղտնիության ռեժիմը խախտելը:
- 2.16. Եթե դասախոսական կազմի անդամը հայտնաբերում է, որ պատասխանին պատրաստվող կամ պատասխանող սովորողը թույլ է տվել համալիր քննության կարգի խախտում, ապա նա, հաշվի առնելով սովորողի արարքի ազդեցությունը համալիր քննության բնականոն ընթացքի, ինչպես նաև սովորողի գիտելիքների, կարողությունների և հմտությունների գնահատման օբյեկտիվության վրա, դադարեցնում է համալիր քննությանը տվյալ սովորողի մասնակցությունը կամ նախազգուշացնում այն մասին, որ երկրորդ անգամ խախտում թույլ տալու դեպքում նրա մասնակցությունը համալիր քննությանը կդադարեցվի:
- 2.17. Համալիր քննությանը սովորողի մասնակցությունը դադարեցնելու մասին կազմվում է արձանագրություն: Արձանագրության մեջ նշվում է համալիր քննության անցկացման օրը, դասակը (խումբը), սովորողի անունը, հայրանունը և ազգանունը, համալիր քննությանը սովորողի մասնակցությունը դադարեցնելու հիմքը: Արձանագրությունը ստորագրվում է դասախոսական կազմի անդամի և սովորողի կողմից: Սովորողի կողմից արձանագրությունը ստորագրելուց հրաժարվելու դեպքում համապատասխան նշում է կատարվում արձանագրության մեջ:
- 2.18. Եթե սովորողի արարքն իր մեջ գաղտնիության ռեժիմի խախտում է պարունակում, ապա դադարեցվում է համալիր քննությանը տվյալ սովորողի մասնակցությունը և արձանագրության մեջ այդ փաստն ամրագրելուց հետո, զեկուցագիր (դիմում) է ներկայացվում Կրթահամալիրի ղեկավարին:
- 2.19. Համալիր քննությանը սովորողի մասնակցությունը դադարեցնելու դեպքում քննական տեղեկագրում որպես գնահատական ամրագրվում է 0 միավորը:

3. ՀԱՄԱԼԻՐ ՔՆՆՈՒԹՅԱՆ ԱՐԴՅՈՒՆՔՆԵՐԻ ԳՆԱՀԱՏՈՒՄԸ ԵՎ ԱՄՐԱԳՐՈՒՄԸ

3.1. Համալիր քննության արդյունքները գնահատվում են 20 միավորային համակարգով՝ հետևյալ սանդղակով.

գնահատականը թվերով	գնահատականը տառերով
0-7	անբավարար
8-12	բավարար

13-17	լավ
18-20	գերազանց

3.2. Համալիր քննության գնահատականը ձևավորվում է տոմսում բովանդակվող տեսական հարցերի և թեստի պատասխանների գնահատականների հանրագումարից: Տեսական յուրաքանչյուր հարցի պատասխան առավելագույնը գնահատվում է 5 միավոր՝ 1 գնահատման քայլով: Թեստային առաջադրանքների պատասխանը առավելագույնը գնահատվում է 10 միավոր՝ յուրաքանչյուր առաջադրանքի ճիշտ պատասխանը 0,5 գնահատման քայլով: Եթե տոմսի տեսական հարցերի և թեստի պատասխանների գնահատականների հանրագումարը կազմում է ոչ ամբողջական թիվ, ապա կլորացվում է հաջորդ ամբողջական թվով: Համալիր քննությանն անհարգելի չներկայանալը հավասարվում է անբավարար գնահատականի՝ 0 միավոր:

3.3. Համալիր քննության գնահատականը ամրագրվում է համալիր քննության տեղեկագրում և հայտարարվում սովորողին՝ նրա պատասխանը լսելուց և թեստի արդյունքները ստուգելուց հետո:

3.4. Համալիր քննությունից բավարար և ավելի բարձր գնահատական ստացած սովորողներին տրվում է վերապատրաստման վկայական:

3.5. Համալիր քննությունից անբավարար գնահատական ստացած կամ անհարգելի չներկայացած սովորողը՝ այդ պահից երեք աշխատանքային օրվա ընթացքում Կրթահամալիրի պետին ներկայացնում է գեկուցագիր՝ քննությունը վերահանձնելու խնդրանքով: Կրթահամալիրի ռեկտորի կողմից վերահանձնումը թույլ տալու դեպքում՝ քննությունն անցկացվում է անբավարար գնահատական ստանալու կամ քննությանն անհարգելի չներկայանալու օրվանից 10 աշխատանքային օրվա ընթացքում: